



TEKS UCAPAN

**YANG MULIA
DATO PADUKA HAJI MUSTAPPA BIN HAJI SIRAT
TIMBALAN MENTERI PERTAHANAN
BRUNEI DARUSSALAM**

“PERPADUAN DALAM PERTAHANAN”

**MAJLIS PERASMIAN LATIHAN KURSUS PEGAWAI KADET
PENGAMBILAN KE-9 2012 / 2013**

**12 ZULKAEDAH 1433
28 SEPTEMBER 2012**

**DEWAN MAKAN SEKOLAH PEGAWAI KADET
AKADEMI PERTAHANAN
ANGKATAN BERSENJATA DIRAJA BRUNEI
PERKHEMAHAN SUNGAI AKAR**

بِسْمِ اللَّهِ الرَّحْمَنِ الرَّحِيمِ

Alhamdulillah Rabbil 'Alamin. Wassalatu Wassalamu
'Ala Asyrafil Anbiya'i Wal Mursalin, Sayyidina Muhammadin
Wa'ala Alihi Wa Sohibi Ajma'in.

Rabbisyrahlii Shadrii
Wa Yassirlii 'Amrii
Wahlul Uqdatam Millisaanii
Yafqahuu Qaulii

Yang Mulia Pemerintah Angkatan Bersenjata Diraja
Brunei, Mejar Jeneral Dato Paduka Seri Haji Aminuddin Ihsan
bin Pehin Orang Kaya Saiful Mulok Dato Seri Paduka Haji
Abidin,

Yang Mulia Setiausaha Tetap Pentadbiran dan
Kewangan, Puan Hajah Suriyah binti Haji Umar,

Yang Mulia Setiausaha Tetap Dasar Pertahanan dan
Pembangunan, Pengiran Dato Paduka Haji Azmansham bin
Pengiran Haji Mohammad,

Yang Dimuliakan dan Yang Mulia ahli-ahli Jawatankuasa
Eksekutif Pertahanan,

Pemerintah-Pemerintah Tentera dan Komandan;

Komandan Akademi Pertahanan, Pengarah-Pengarah
dan Pegawai-Pegawai Kanan;

Yang Saya hormati para Ibu Bapa, keluarga, Pegawai-
Pegawai Kadet serta hadhirin dan hadhirat sekalian,

Assalamu'alaikum Warahmatullahi Ta'ala Wabarakatuh
dan Salam Sejahtera.

Alhamdulillah, segala puji dan syukur ke hadhrat Allah
Subhanahu Wa Ta'ala yang telah mengurniakan kita dengan
segala rahmat dan kebaikan, serta mengizinkan kita
berhimpun di pagi Jumaat yang mulia ini, bagi Majlis

Perasmian Latihan Kursus Pegawai Kadet Pengambilan Ke-9, Sekolah Pegawai Kadet Angkatan Bersenjata Diraja Brunei.

Selawat serta Salam ke atas junjungan besar Nabi Muhammad Shalallahu 'Alaihi Wasallam, kaum kerabat, sahabat-sahabat dan pengikut-pengikut baginda yang telah mensyariatkan sinar Islam kepada seluruh umat.

Dengan penuh rasa syukur dan rendah hati, saya sukacita mengalu-alukan penyertaan 48 orang Pegawai Kadet, yang terdiri dari 34 orang Lelaki dan 14 orang Perempuan, yang telah terpilih untuk mengikuti latihan asas ketenteraan dan menceburi kerjaya sebagai pegawai tentera di Angkatan Bersenjata Diraja Brunei.

Pengambilan Pegawai-Pegawai Kadet kali ini, sesungguhnya membawa makna yang besar dan mendalam kepada kita semua, terutama kepada Angkatan Bersenjata Diraja Brunei khususnya, dan kepada pembangunan pertahanan Negara umumnya.

Penyertaan Pegawai-Pegawai Kadet dan kehadiran para Ibu Bapa dan keluarga di majlis ini, jelasnya mencerminkan keyakinan dan keazaman kita semua untuk mendokong pertahanan Negara, lebih-lebih lagi ketika mana kita berhadapan dengan berbagai cabaran dan dugaan, baik dari segi ancaman-ancaman keselamatan serantau dan antarabangsa ataupun musibah yang berlaku kepada kita sendiri.

Keadaan ini jelas membuktikan bahawa perpaduan dan sokongan padu daripada Ibu Bapa, keluarga dan seluruh masyarakat dan rakyat di Negara ini, adalah merupakan asas penting bagi kita terus tegak membina benteng pertahanan, demi kesinambungan Keselamatan dan Keamanan negara.

Justeru itu saya ingin mengucapkan setinggi-tinggi penghargaan dan terima kasih kepada semua graduan, serta Ibu Bapa dan keluarga mereka yang telah memberi segala sokongan dan galakan untuk memasuki kerjaya tentera.

Pada hemat saya, semangat patriotisme yang tinggi di kalangan rakyat di Negara ini, adalah hasil dari kepimpinan

yang berwibawa daripada Raja yang kita kasihi, Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddien Waddaulah, Sultan dan Yang Di-Pertuan Negara Brunei Darussalam.

Kita bersyukur mempunyai Raja yang prihatin terhadap keselamatan dan kesejahteraan rakyat, menghargai segala peranan dan sumbangan yang dihulurkan oleh setiap individu, setiap pegawai kadet dan tentera, malah setiap rakyat Baginda.

Dalam titah Baginda semasa *Sovereign's Parade* Pengambilan Ke-7, Baginda sangat memberi perhatian kepada peranan dan pengorbanan Ibu Bapa dan keluarga yang tidak mengenal batasannya.

Atas asas ini ketaatan kita harus kita tumpukan dan berikan sepenuhnya kepada kepimpinan Baginda, agar kita bersatu padu dan berpayung di bawah Kepimpinan Baginda dalam menjaga pertahanan dan keselamatan Negara.

Dari perpaduan dan keikhlasan ini, dan dengan keimanan yang tidak boleh diganggu-gugat, juga lahirnya Angkatan Tentera yang kita harap akan mendapat keredhaan dari Allah Subhanahu Wa Ta'ala jua dan sentiasa di bawah perlindungannya.

Inilah semangat murni yang harus kita semai, biar akan selama-lamanya subur, dan memberi kita kekuatan untuk terus berhadapan dengan sebarang cabaran yang mendatang, dan bukan lari daripadanya.

Walau seberat manapun tanggungjawab yang harus dilaksanakan itu, Insya Allah akan kita pikul bersama dengan petunjuk Allah Subhanahu Wa Ta'ala jua.

Setiap dugaan dan cabaran tidak akan kita biarkan untuk melemahkan kita, bahkan segala apa yang kita lalui akan dijadikan sebagai sumber perpaduan dan kekuatan tentera.

Bak Kata Pepatah,

“Biduk lalu Kiambang bertaut,

Pantang mundur, Membujur lalu dan Melintang patah”.

Kita bersyukur kerana pagi ini kita berhadapan dengan para lulusan graduan dan cendekiawan yang menghargai hakikat ini dan peka kepada aspirasi negara.

Dan yang sudah nyata mereka ingin memainkan peranan dengan menceburkan diri dalam kerjaya tentera.

Profesion tentera sering sinonim dengan kekuatan semangat, disiplin dan fizikal diri.

Saya percaya Pegawai-Pegawai Kadet, yang terpilih dari lulusan Diploma dan Ijazah dari berbagai bidang, sudah menepati kehendak ini.

Tinggal lagi persoalannya, sejauh manakah nilai-nilai ilmu dan jati diri ini dapat membawa perubahan dan

pembaharuan kepada diri masing-masing, kepada pasukan, dan kepada institusi tentera keseluruhannya.

Kementerian Pertahanan dan Angkatan Bersenjata Diraja Brunei, seperti yang pernah Peramba, Kaola, Saya katakan merupakan satu institusi yang dinamik yang terus bergolak dengan mengikut arus peredaran zaman.

Setiap apa yang berlaku, tidak akan terbiar berlalu begitu saja, malah apa yang pernah dialami dan dilalui itu akan terus menjadi iktibar dan pengajaran yang akan meningkatkan lagi azam dan iltizam kita untuk meningkatkan kewibawaan institusi tersebut.

Kita harapkan kepada Pegawai-Pegawai Kadet yang akan menjalani latihan supaya akan terus memupuk semangat perpaduan, membawa obor pembaharuan dan perubahan dalam Angkatan Bersenjata Diraja Brunei, atas nama membina pertahanan yang *credible* dan profesional.

Masih banyak yang perlu kita perkatakan dalam membuat perubahan. Ia merangkumi perubahan minda, perubahan budaya, perubahan sikap dan sebagainya, semua ini harus membawa objektif pertahanan seperti yang termaktub dalam Kertas Putih Pertahanan bahawa Angkatan Tentera Kita adalah sebuah angkatan yang *Professional, Resource Efficient, dan Gallantry*.

Inilah yang ingin saya tegaskan, bukan saja kepada Pegawai-Pegawai Kadet, bahkan juga kepada Sekolah Pegawai Kadet dan Akademi Pertahanan, agar lebih relevan dalam kita meniti arus peredaran zaman.

Sepertimana jua halnya dengan organisasi di tempat lain, tidak kira tentera mahupun awam, akan sentiasa berkehendakkan setiap generasi baru itu akan menjadi lebih baik dari yang sebelumnya.

Sejajar dengan tabiat semulajadi bagi seseorang yang inginkan kemajuan, pengetahuan dan kemahiran haruslah berkembang mengikut peredaran masa. Perkembangan ini

tidak syak lagi perlulah didorong dengan sokongan dari semua institusi yang terlibat.

Oleh itu Sekolah Pegawai Kadet, perlu terus mengkaji dan mengkaji, dan mempunyai *flexibility*, bagi meningkatkan lagi kualiti latihan dan pembelajaran untuk mencapai misi penubuhannya.

Tidak lupa juga kepada sokongan dan dorongan Ibu Bapa serta ahli keluarga dalam perkara ini adalah sentiasa diharapkan, semoga ia akan terus menyuntik semangat kepada semua Pegawai-Pegawai Kadet untuk merealisasikan potensi mereka dengan memberikan yang terbaik semasa latihan.

Akhir kata, saya ingin mengucapkan syabas dan tahniah kepada semua Pegawai Kadet serta Ibu Bapa dan keluarga, dan saya berdoa agar semua 48 orang Pegawai Kadet yang ada pada masa ini berjaya menamatkan latihan dengan cemerlang, Insya Allah.

Dengan berkat kalimah Bismillahir Rahmanir Rahim, saya dengan sukacitanya merasmikan Latihan Kursus Pegawai Kadet Pengambilan Ke-9, Sekolah Pegawai Kadet Angkatan Bersenjata Diraja Brunei.

Sekian, Wabillahit Taufik Wal Hidayah Wassalamu'alaikum Warahmatullahi Ta'ala Wabarakatuh.